



Eich cyf P-06-1494
Ein cyf LN/10537/24

Carolyn Thomas AS
Cadeirydd y Pwyllgor Deisebau
Senedd Cymru
Bae Caerdydd
Caerdydd
CF99 1SN

18 Rhagfyr 2024

Annwyl Carolyn,

Diolch am eich llythyr dyddiedig 2 Rhagfyr ynghylch Deiseb P-06-1494 Llywodraeth Cymru i ddiogelu cyllid addysg rhag toriadau gan Lywodraeth Cymru a'r Awdurdodau Lleol.

Rwy'n cydnabod bod yr argyfwng costau byw yn rhoi ysgolion ac awdurdodau lleol dan bwysau sylweddol. Rwy'n gwerthfawrogi ymdrechion diflino gweithlu'r ysgol wrth iddynt barhau i weithredu mewn cyd-destun heriol, gan gynnwys y lefelau absenoldeb parhaus a'r effeithiau ar ymddygiad mewn ystafelloedd dosbarth, ynghyd â phroblemau iechyd meddwl a lles. Ers dechrau ar fy swydd fel Ysgrifennydd y Cabinet dros Addysg yn gynharach eleni, rwyf wedi gwrandao ar ein partneriaid addysg ledled Cymru ac rwy'n deall yr heriau y maent yn eu hwynebu.

Ar 6 Rhagfyr cyhoeddais £50m yn ychwanegol yn 2024-25 i gefnogi safonau a seilwaith addysg ledled Cymru. Mae hyn yn adlewyrchu pwysigrwydd buddsoddi yn ein dysgwyr a'r system addysg sy'n eu cefnogi, a'm hymrwymiad i hynny.

Er ein bod yn croesawu Cyllideb yr Hydref Llywodraeth y DU sy'n darparu cyllid refeniw a chyfalaf ychwanegol i Lywodraeth Cymru yn 2024-25 a 2025-26, rydym yn parhau i wynebu heriau ariannol sylweddol. Cyhoeddwyd ein Cyllideb Ddrafft ar gyfer 2025-26 ar 10 Rhagfyr. Mae ein cyllideb yn canolbwyntio ar ein blaenoriaethau, gan gynnwys y rhai a nodwyd gan y Prif Weinidog, ac ar sicrhau bod gwasanaethau cyhoeddus yn parhau i ddarparu ar gyfer pobl Cymru.

Rydym yn blaenoriaethu buddsoddiad i awdurdodau lleol, yn union fel y gwnaethom mewn blynyddoedd blaenorol, drwy ddarparu cynnydd o £253m i'r Setliad Llywodraeth Leol yn 2025-26, cynnydd o 4.3% wrth gymharu tebyg a thebyg. Byddwn yn parhau i weithio mewn partneriaeth ag awdurdodau lleol i sicrhau ein bod yn gwneud popeth o fewn ein gallu gyda'r cyllid sydd ar gael.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Lynne.Neagle@llyw.cymru
Correspondence.Lynne.Neagle@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Yn ystod 2024-25 a 2025-26, bydd y sector addysg yn elwa ar £225.5m o gyllid, gydag ysgolion, colegau a lleoliadau eraill yn cael cyllid i helpu i ddiwallu anghenion dysgwyr ledled Cymru. Mae hyn i gyd yn ychwanegol at y cynnydd arfaethedig i'r Setliad Llywodraeth Leol yn 2025-26, sy'n cydnabod y pwyntiau pwerus y mae partneriaid yr awdurdodau lleol a'n hysgolion wedi'u gwneud ynghylch pwysau i gyflawni'r cyfrifoldeb statudol am ADY a darpariaeth addysg ehangach.

Wrth gefnogi ysgolion ac awdurdodau lleol, ac wrth fwrw ymlaen â'r buddsoddiad ychwanegol, rydym wedi cynyddu'r cyllid ychwanegol a ddarparwn drwy'r Grant Addysg Awdurdodau Lleol (LAEG) 5.5% yn gyffredinol o'i gymharu â 2024-25, i gyfanswm o ychydig o dan £400m.

Yn ogystal â chyllid ychwanegol o £15m yn ystod y flwyddyn i gefnogi Anghenion Dysgu Ychwanegol (ADY), mae Cyllideb Ddrafft 2025-26 hefyd yn diogelu ac yn parhau i flaenoriaethu buddsoddiad o dros £37.6m o gyllid refeniw mewn diwygio ADY. Mae hyn yn cynnwys £14m yn ychwanegol i gynyddu'r cymorth i gyflawni cyfrifoldebau statudol Deddf Anghenion Dysgu Ychwanegol a'r Tribiwnlys Addysg (Cymru). Bydd hyn yn dod â chyfanswm y cyllid a ddyrannir yn uniongyrchol i awdurdodau lleol a lleoliadau addysg i £32m.

Ers 2020, mae Llywodraeth Cymru wedi cynyddu'r buddsoddiad mewn ADY yn sylweddol, gyda dros £107m i helpu i roi ein diwygiadau ADY ar waith yn ogystal â darparu buddsoddiad cyfalaf o £60m i awdurdodau lleol yng Nghymru er mwyn gwella cyfleusterau a seilwaith ar gyfer dysgwyr ag ADY. Mae dros £150m o gyllid refeniw hefyd wedi'i ddyrannu i gefnogi ADY yn y sector addysg bellach ôl-16 trwy leoliadau arbenigol ôl-16 a chyllid Cymorth Dysgu Ychwanegol.

Mae'r Rhaglen Cymunedau Dysgu Cynaliadwy yn buddsoddi dros £750 miliwn dros y naw mlynedd nesaf er mwyn parhau i wella ac ehangu cyfleusterau presennol a chreu darpariaeth arbenigol newydd.

Gwelliant parhaus mewn safonau addysgol yng Nghymru yw fy mhrif flaenoriaeth ac fe nodais fy mlaenoriaethau allweddol i ysgogi gwelliannau yn fy [Natganiad Llafar ar 5 Tachwedd](#). Mae'r rhain yn cynnwys gwella cyfraddau presenoldeb a phwysigrwydd llythrennedd a rhifedd fel hanfodion dysgu. Mae'r Cwricwlwm a diwygio ADY hefyd yn parhau'n ganolog i'r gwaith. Rwyf wedi trafod fy mlaenoriaethau gyda Chyfarwyddwyr Addysg ac wedi ysgrifennu at bob ysgol, fel bod yr holl wybodaeth ganddynt.


Bydd £20m ychwanegol yn cael ei ddarparu drwy elfen Safonau Ysgolion yr LAEG i wella safonau mewn ysgolion, gan godi'r pecyn cymorth hwn i £180m yn 2024-25. Bydd y cyllid ychwanegol hwn yn ystod y flwyddyn yn darparu cymorth y mae ei angen yn fawr ar ysgolion a lleoliadau eraill i helpu i ddiwallu anghenion dysgwyr.

Rydym yn cymryd camau ar unwaith i gefnogi cyrhaeddiad, gan gynnwys buddsoddiad ychwanegol o £1.1m eleni mewn rhaglenni llythrennedd, rhifedd a gwyddoniaeth. Mae hynny'n cynnwys £470,000 i ymestyn y *Rhaglen Iaith a Llythrennedd*, sydd eisoes wedi gweld dysgwyr yn gwella eu sgiliau darllen hyd at 20%, ac rydym wedi cynyddu ein buddsoddiad yn y Rhaglen Gymorth Mathemateg i dros £500,000 eleni - gan roi mynediad i fwy o ddysgwyr at ddosbarthiadau meistr mathemateg, clybiau mathemateg, a dysgu proffesiynol pellach i athrawon.

Llythrennedd a rhifedd yw sylfeini dysgu, ac rydym hefyd yn buddsoddi £10m ychwanegol i gefnogi dysgu a chyrhaeddiad yn y meysydd hyn fel rhan o Gyllideb Ddrafft 2025-26.

Mae'n hanfodol cadw sianeli cyfathrebu ar agor yn ystod y cyfnod arbennig o anodd hwn ac rydym wedi ymrwymo i gynnal y ddeialog agored ac adeiladol yr ydym wedi'i sefydlu gyda'n partneriaid ar draws y system wrth i ni weithio gyda'n gilydd i ddarparu'r gorau i'n dysgwyr.

Yn gywir,

A handwritten signature in dark ink, appearing to read 'Lynne Neagle'.

Lynne Neagle AS/MS

Ysgrifennydd y Cabinet dros Addysg